



Republika e Kosovës  
Republika Kosova - Republic of Kosovo



Agjencia e Kosovës për Akreditim  
Agencija Kosova za Akreditaciju  
Kosovo Accreditation Agency

KA/Nr. 2905/20  
Datë: 23/11/2020

Komisioni i Ankesave në Agjencinë e Kosovës për Akreditim, i themeluar me Vendimin Nr.1448/20D, ta datës 04.09.2020, në përbërje të Bujar Pira, Muhamet Qerimi dhe Krenare Sogojeva Dermaku, në shqyrtimin e lëndës administrative, respektivisht ankesës së Kolegjit Universi, e datës 25.08.2020 kundër Vendimit të KSHC Nr. 1087/20D të datës 27.07.2020 për mos akreditim Institucional, e pranuar më 23.10.2020, në mbështetje të Ligjit Nr.05/L-031 për procedurën e përgjithshme administrative, Udhëzimin Administrativ (MASHT) Nr.15/2018 për akreditimin e institucioneve të arsimit të lartë në Republikën e Kosovës, në mbledhjen e datës 11.11.2020, me shumicë votash, mori këtë:

VENDIM

Refuzohet si e pa bazuar ankesa e Kolegjit Universi e datës 25.08.2020 dhe vërtetohet Vendimi i KSHC-së Nr. 1087/20D i datës 27.07.2020.

ARSYETIM

Kolegji Universi më datë 25.08.2020, brenda afatit ligjor ka parashtruar Ankesë pranë Agjencisë së Kosovës për Akreditim, përmes së cilës ka kërkuar që Këshilli Shtetëror i Cilësisë të rishqyrtoj vendimin e tij të datës 27.07.2020, nr. 1087/20D, me të cilin nuk është riakredituar në nivel Institucional. Pala me Ankesën e datës 25.08.2020 pretendon se:

Këshilli Shtetëror i Cilësisë pa të drejtë ka refuzuar akreditimin në nivel institucional për shkak të konstatimit të gabuar të gjendjes faktike dhe shkeljeve të dispozitave ligjore.

Fillimisht pala ka pretenduar se nuk iu është dhënë kohë e mjaftueshme për përgatitjen e komenteve në draft-raportin e ekspertëve, duke u mbështetur në pikën pesë (5) të nenit 17 të Udhëzimit Administrativ për Akreditim, i cili përcakton se: *“AKA e dërgon draft raportin e vlerësimit tek institucioni. Institucioni ka të drejtë të dorëzojë komente me shkrim mbi raportin fillestar të vlerësuesve të jashtëm. Komentet mund të mbulojnë çfarëdo informacioni faktik të përfshirë në raport, por jo në rekomandimet e dhëna nga vlerësuesit e jashtëm. Komentet duhet të dorëzohen në AKA, më së largu brenda dy (2) javësh pas pranimin të draft raportit”.*

Më tutje ka atakuar me ankesë Vendimi i KSHC duke kundërshtuar raportin e ekspertëve në standardet e parapara me Manualin e Akreditimit (korrik 2018), si në vijim:

- Misioni publik dhe objektivat institucionale;
- Planifikimi dhe menaxhimi i financave

- Menaxhimi i cilësisë;

Pala ka pretenduar se këto standarde janë plotësuar, duke paraqitur argumente e veta.

KSHC, pas pranimit të raportit nga ekspertët ka konstatuar se raporti i ekspertëve ndërkombëtar të akreditimit konstaton se nga gjithsej 11 kapituj të standardeve të parapara në Manualin e Akreditimit, Kolegji Universi përmbushë substancialisht 5 dhe pjesërisht 6 standarde.

#### **Provat e administruara:**

- Vendimi i KSHC-së Nr. 1087/20D, datë 27.07.2020;
- Raporti final i ekipit të ekspertëve;
- Njoftimi nga AKA për paraqitjen e komenteve në draft-raportin e ekspertëve;
- Raporti i KSHC-së për rishqyrtimin e ankesës nga takimi i datës 02.09.2020

#### **Shpjegim i situatës faktike mbi të cilën është marrë vendimi**

Komisioni i Ankesave pranë AKA-së, ka pranuar ankesën e datës 25.08.2020 e Kolegjit Universi me datë 23.10.2020, së bashku me dokumentacionin dhe raportin e KSHC-së nga takimi i datës 02.09.2020, me të cilën ka përshkruar pretendimin e palës dhe arsyen e refuzimit të kërkesës për akreditim.

Komisioni i Ankesave, pas shqyrtimit të ankesës dhe provave të bashkëngjitura ka gjetur se:

Pala është njoftuar nga AKA për paraqitjen e komenteve në draft-raportin e ekspertëve. Pala nuk ka realizuar kundërshtimin për kohën e shkurtë në dispozicion, duke prezumuar të drejtën e tij për sa i përket zbatimit të nenit 17, paragrafit 5 të UA (MASHT) Nr. 15/2018 për akreditimin e IAL-ve.

Ndërsa, Ekipi i ekspertëve ndërkombëtarë të angazhuar nga AKA për vlerësimin e Kolegjit Universi nga gjithsej 11 kapituj të standardeve të parapara në Manualin e Akreditimit plotëson substancialisht 5 dhe pjesërisht 6 standarde. Po ashtu, ekipi i ekspertëve në fund të raportit ka rekomanduar që të mos akreditohet në nivel institucional Kolegji Universi.

#### **Shkaqet të cilat kanë qenë vendimtare gjatë vlerësimit të provave**

Komisioni i Ankesave, pasi ka konstatuar se ankesa e Kolegjit Universi është parashtruar brenda afatit kohor, ka shqyrtuar pretendimet e palës për mos akreditimin institucional.

Komisioni i Ankesave e ka analizuar raportin e ekspertëve ku ekspertet ndërkombëtarë nuk kanë rekomanduar akreditimin në nivel institucional të Kolegjit Universi sepse i njëjti nga gjithsej 11 kapituj të standardeve të parapara në Manualin e Akreditimit, plotëson substancialisht 5 dhe pjesërisht 6 standarde.

## Baza ligjore e vendimit dhe arsyeja pse është e zbatueshme në rastin konkret

Bazuar në nenin 18, paragrafi 2 të UA Nr.15/2018 për akreditimin e IAL-ve, i cili përcakton se: *"Duke u bazuar në rekomandimet nga raporti i vlerësuesve të jashtëm, KSHC merr vendimin për akreditim ose mosakreditim."*

Nga kjo, mund të vërehet se nuk janë përmbushur kërkesat ligjore për përmbushjen e standardeve sipas Manualit të Akreditimit (Korrik 2018), i cili përcakton se: *"Për të marrë një vendim pozitiv për programin dhe ri-akreditimin institucional, çdo ofrues i arsimit duhet të demonstrojë të paktën një nivel të konsiderueshëm pajtueshmërie në gjykimin e përgjithshëm. Prandaj, dështimi në përmbushjen e të paktën një niveli të përgjithshëm të pajtueshmërisë përfshinë vonimin, tërheqjen, pezullimin ose mohimin e akreditimit "*

Andaj, sipas nenit 18, paragrafin 2 të UA 15/2018 për akreditimin e IAL-ve të, Komisioni i Ankesave vlerëson se deri sa KSHC merr vendim bazuar në rekomandimet nga raporti i ekspertëve të jashtëm, atëherë Vendimi nr. 1087/20D, datë 27.07.2020 i KSHC-së ka bazë ligjore dhe arsyeshmëri të plotë.

Pala me datë 29.10.2020, ka qenë e ftuar nga Komisioni i Ankesave për ta ushtruar të drejtën e vet për tu dëgjuar, ashtu siç e parasheh nenin 95 i Ligjit Nr.05/L-031 për Procedurën e Përgjithshme Administrative. Kolegji Universi e ka realizuar këtë të drejtë dhe ka parashtruar prova shtesë, për të cilat Komisioni i Ankesave i ka vlerësuar si barrë e provës nga ekipi i ekspertëve ndërkombëtarë në hartimin e raportit final.


Në përfundim,

Komisioni i Ankesave pasi shqyrtimit dhe administrimit të provave, vërtetimit të gjendjes faktike dhe legjislacionit në fuqi, mbi bazën e kompetencave të dhëna me nenin 22, paragrafin 3 të Udhëzimit Administrativ (MASHT) për akreditimin e institucioneve të arsimit të lartë, ka vendosur si në dispozitiv të këtij Vendimi.


Komisioni i Ankesave në AKA

KA/Nr. 2905/20, datë 23/11/2020

Procesmbajtësi

  
Arianit Krasniqi

Kryetari i Komisionit të Ankesave

  
Faton Merovci



**Këshillë Juridike:** Kundër këtij Vendimi pala e pakënaqur ka të drejtë ankese në afat prej 30 ditëve në gjykatën kompetente për konfliktet administrative.